



# Ra Fregores

Alcuanta noes in curto dal nosc paes e da fora

## Pelegrinajo ladin

Par i Ladis de ra Dolomites, par duta ra so storia, i pelegrinaje i à senpre soà par i tegni aduna, par se conosce, da 'na val a cher'outra. Coscita chesta tradizios 's à un gran valor, che v' a se s'ontà a ra religjon, a ra fede. Da canche i Ladis i à el so santo Bepe Freinademetz, i v' in pelegrinajo a Oies in Badia, agnò che 'l é nasciù. Par ruà su da ra so c'iaša se fesc ra Via Crucis, che moe da San Leonardo.

A rodoletto, ogni an, tocia a una de ra zinche unios ladines de val, che à el braghier de parecià ra portiscion; 'sta ota tocia a chera da Fodom. El di 'l é senpre 'l ultimo sabeda de el mes de setembre: 'sto an el toma ai 24. Anche 'sta ota ra Union de i Ladis d'Anpezo r' à vorù bete el pullman, da s' in Badia. Se moe daes 13.15, da ra stazion; se rua a San Leonardo daes 14.30, par se ciatà, dute i pelegris, de duta ra vales, inze jeja. Daes 15 moe ra portiscion, che ra v' a su par ra stazion de ra Via Crucis; daes 16 'l é ra mesa, inze el santuario de Oies. Canche ra fenisce, cemodo che se uša, 'l é 'na beerela par dute i pelegris, anche par se conosce, par fei cuatro ciacoles. Ci che fesc fadia a caminà, pò ruà su col pullman. Se pensa de ruà danoo in Anpezo intor res 20. Par se notà inze, se pò ciamà o pasà inze 'l ufizio de r'Ulda, in piazzeta San Francesco, in Ciaša de ra Regoles.

## Duto noo, duto conpain

El comisario Carlo De Rogatis, che el tien el comun de Anpezo, da doi mesc, 'l à vorù tuoi par man i ufizie e el parsonal, e a ra fin duto 'l é restà cemodo che 'l ea. Inze 'l ufizio tavolare 'l é restà Paola Lezuo, che el comisario 'l à vorù zerne, intrà ra tre domandes che 'l ea ruà; par el servizio demografico e sozjal resta Claudio Talamini; a i tende a i conte sarà ancora Augusto Pais Becher, betù dal comisario, anche se el no n'aea fato domanda; pa el fabricà 'l é senpre Silvia Balzan; par i laore de comun Stefano Zardini Lacedelli; a comandà i poliziotte de comun 'l é ancora Ines De Biasi; a capo del patrimonio 'l é Gianluca Masolo; par el parsonal 'l é Lorena Bettello, che però r' à domandà de s' in s' i, co i 16 de ottobre, che ra v' in pension; el sacretario resta Enrico Pilotto, anche se el no n'aea fato domanda.

## El gnee de setembre

Se conta ra taies sò dal pe de ra luda, i dijea i vece boschiere, che i saea cemodo lourà. No se pò fei i conte dinprin, o mangare ancora ignante de scomenzà: coscita 'l é difizile pesà 'l inverno da setembre, dal prin gnee che s' à vedù su ra zimes.

Par el web i à mostrà bela fotografies, con duto bianco: s' in à vedù su par Tofana, agnò che i ome del socorso in croda i à abù da dià doa parsones, che à pasà ra note in paré. L ea duto bianco in Lagazuoi, sul sorei del rifujo. Duto bianco in forzela Fontana Negra e inze trope outre luoghe, su par ra nostra crodes. Ma, cemodo che no basta 'na zilia, a fei ruà r'ousciuda, coscita no se pò propio pesà 'l inverno, dal prin gnee de setembre, vegnù a sbianchià ra zimes e a sfardà ra vales. Ades speton de vede cemodo che sirà inaante 'l outon e canche ruarà dasen 'l inverno.

## Laore par stradon

Se laora, par un pei de mesc, sul stradon 48 de ra Dolomites, che mena da Anpezo ves el s'uoigo de Fuzargo, alolo sora de Pocol. I à daerto un cantier par fei su un muro, che 'l é drio a s' in s' i sò co ra boa. Sarà da i tende, da pasà nafré pi pian, co i automobiles, da i 20 de setembre fin ai 28 de noembre, parcé che i sara meša ra strada e se pasa un a ra ota, in discdisc, e 'l é da se fermà, col semaforo ros, da res 7 da bonora fin daes 17 de dute i dis, anche del sabeda, del domegna e canche 'l é festa. A fei i laore 'l é ra dita Tollot, par conto de ra sozietà Veneto Strade.

## In Anpezo ra stajon se slonga

Ra sozietà de impiante Cortina Cube r' à vorù tegni daerto 'na setemana depi, fin a domegna 25 de setembre, ra teleferica che moe da ra stazion e rua su in Faloria e anche el rifujo, a 2.000 metre. Dinprin i aea dito de ruà fin a domegna 18.

Anche chesto poia pede, par i sporse algo depi a ra s'ente che vien inze 'l nosc paes, par ra stajon d'istade. Ades, de setembre, 'l é pi che see foreste, parsones che à acaro de caminà, de se moe su par ra crodes, par rifuje, e mangare anche de dorà i impiante. Chi de ra sozietà Averau i tien daerto 'l impianto

Cinque Torri, da Bain de Dones al rifujo Scoiattoli, fin a domegna 2 de ottobre. I ultime a sarà 'l é chi de Lagazuoi, co ra teleferica che mena su da Fuzargo, daerta fin a domegna 23 de ottobre.

## Par inparà a disegnà

Da alcuante ane, de ousciuda e d'outon, ra Regoles d'Anpezo es daerse un corso par inparà a depenē e a disegnà; par maestre 'l é i doi artistes Paolo Barozzi e Gianni Segurini. I anes pasade 'l ea senpre un grun de persones, almanco vinte a ra ota, che s'ia a inparà. Par chesto outon i à pensà de fei zinche lezios, par inparà a dorà ra pena e el lapis. Soralduto, con chesto corso se inpara a vardà polito chel che ón d'intorno, a vede ra natura con outre oce, a lieše chel che 'l é stà scritto dal Creator. Dapò, co ra pena, el lapis, i colore, se proa a 'l bete su 'l sfoi, ma ignante de duto 'l é da 'l vede de inze, co i coe, co ra testa, col cuore.

Par ra lezios de 'sto an se scomenza de fora, co ra prima, en plein air, cemodo che dijea i Imprescionistes franzeses, de 'l Otozento: domegna ai 25 de setembre se se ciata su dai brites de Fedarola, alolo bonora. Dapò, par ches'outra lezios, canche vien fiedo, se se tira de inze, in Ciaša de ra Regoles, da dasera daes 20.30, ai 27 e 30 de setembre e ai 4 e 7 de ottobre. Par se notà, 'l é da ciamà i ufizie de ra Regoles, agnò che se paga 20 euro; par i studentes costa 10 euro.

## Dute par Cortinametraggio

Se v' sà bel lourà drio el computer, da bete aduna video, podé pensà de mandà i vostre laore a Cortinametraggio, el festival de i film curte, edizion numero 12, che i fajarà in Anpezo 'l an che vien, da i 20 a i 26 de marzo 2017. Ra presidente Maddalena Mayneri r' à daerto el bando par mandà via i film par ra sezios Corticomey e Videoclip de musica: se pò se notà fin a i 6 de febraro de 'l an che vien. Ra prima sezion r' é chera che i fesc ogni an, par i film curte taliane, che pò ese comedia, horror, thriller, fantascienza, poliziesco. Cher'outra sezion, par ra musica, r' é noa de 'sto an, i ra fesc par ra prima ota: se pò mandà videoclip taliane, de ogni sorte de musica, fate dal 1 de jenaro 2016 a i 6 de febraro 2017 e betude fora su Internet. SE ve sà bel fei 'ste

laore, sentreave, che coscita podaré ve fei conosce depi e meo, par duta Italia.

